

**7.7.2011**

**Betreff: Elmer und die Schlange**

Dr Dexter isch unsere Nachtwächter, e ganz e feine Kärli. Dr Elmer unsere Bootsueb (wo jo eher emene legeborene glicht) kunnt ihn ab und zue cho bsueche, und schlooft denn au grad do im Resort (irgendwo im Dschungel wohrschienlig). Gestert zOobe also kömme die zwei plötzlich zu uns, sie hege grad e riese Schlange gseh und die hegi e Baby Geissli gfrässe, es sigi alles voller Bluet.

Das han ich natürlig welle gseh. Ha gfroggt öbs wiet ewäg isch und me het mir versicheret, das sigi nid. Hesch gmeint, mit Taschelampe bewaffnet in de Flipflops hänn mir uns durchs Dickicht kämpft, verbi an Geissli, immer wieder chli vertrampt, wells halt au mit Lampe zimlig dunkel gsi isch. Schlussänldig hänn mir dr Tatort gfunde, alles voller Bluet isch chli übertriebe gsi, e paar Tropfe han ich könne ussmache und vo dr Schlange hänn mir au nüt gseh.

Aber hüt am Morge - ich ha chli länger gschloofe - het me em Mischa voller stolz d Schlange präsentiert. Sie sigi vo stattlicher Grössli gsi und natürlich tot. Sie isch aber kei Vergäbene Tot gstorbe, dr Elmer würdi sie denn also scho ässe!

S Rezäpt für d Schlange isch übrigens:

mit Sojasauce, Ketchup Öl, Zwiebele, Knoblauch, Salz und Pfäffer für 30 Minute abroote, immer chli riehe.

Schmeckt schiens wie Hiehnli :-)